

KAJIAN TERHADAP PENCEGAHAN RASUAH MELALUI AMALAN SIFAT DAN AKHLAK NABI MUHAMMAD SAW DALAM KEHIDUPAN MASYARAKAT

Azman Ab Rahmanⁱ, Md Yunus Abd. Azizⁱⁱ, Ahmad Zaki bin Sallehⁱⁱⁱ & Anis Nabilah^{iv}

ⁱ (Penulis Korespondan) Professor, Fakulti Syariah dan Undang-Undang, Universiti Sains Islam Malaysia, Bandar Baru Nilai, 71800 Nilai, Negeri Sembilan, azman@usim.edu.my

ⁱⁱ Pensyarah Kanan, Fakulti Syariah dan Undang-Undang, Universiti Sains Islam Malaysia, Bandar Baru Nilai, 71800 Nilai, Negeri Sembilan, yunus@usim.edu.my

ⁱⁱⁱ Profesor Madya, Fakulti Syariah dan Undang-Undang, Universiti Sains Islam Malaysia, Bandar Baru Nilai, 71800 Nilai, Negeri Sembilan, ahmadzaki@usim.edu.my

^{iv} Pembantu Penyelidik, Fakulti Syariah dan Undang-Undang, Universiti Sains Islam Malaysia, Bandar Baru Nilai, 71800 Nilai, Negeri Sembilan, anisbella49@gmail.com

Abstrak

Pada era globalisasi di zaman moden ini, gejala rasuah dilihat semakin berleluasa dalam kalangan masyarakat sama ada di Malaysia mahupun luar negara. Hal ini terbukti melalui peningkatan yang ketara pada statistik pemberian dan penerimaan rasuah di Malaysia sejak beberapa tahun kebelakangan ini. Oleh yang demikian, bagi menangani kegiatan rasuah dalam kalangan masyarakat, sifat dan keperibadian Nabi Muhammad SAW dilihat sebagai satu aspek yang penting untuk memupuk nilai yang murni dalam pembangunan jati diri individu. Objektif kajian memfokuskan kepada pendekatan pencegahan rasuah melalui amalan dan sifat akhlak Nabi Muhammad SAW. Kajian juga akan membincangkan impak pemeraksanaan sifat dan akhlak Nabi Muhammad SAW dalam kehidupan semasa. Kajian kualitatif ini menggunakan kaedah dokumentasi untuk menganalisis isu rasuah serta mengenalpasti amalan sifat dan akhlak Nabi Muhammad SAW dalam kehidupan masyarakat. Hasil kajian mendapati bahawa aplikasi sifat dan akhlak Nabi Muhammad SAW merupakan penyelesaian yang tuntas dalam membendung gejala rasuah di Malaysia seperti yang sangat ditekankan oleh agama Islam. Justeru menjadi satu perkara yang penting bagi masyarakat hari ini untuk menyedari akan kepentingan dalam mengamalkan nilai-nilai murni yang ditunjukkan oleh akhlak Nabi Muhammad SAW sebagai teladan dalam menjalani kehidupan bagi mengelakkan rasuah berleluasa.

Kata kunci: Rasuah, akhlak, masyarakat.

PENDAHULUAN

Pembinaan generasi yang kukuh dari segi akhlak dan sifat yang baik memerlukan kepada kewujudan modal insan, organisasi, institusi swasta dan kerajaan yang berkualiti tinggi serta berdaya saing dalam pelbagai sudut. Hal ini kerana dalam memastikan prestasi yang baik dan pencapaian material tidak bertukar kepada ancaman yang merosakkan keharmonian masyarakat dan generasi, maka perlu difokuskan kepada pengukuhan nilai-nilai moral yang tinggi dalam kehidupan seharian. Hal ini sejajar dengan pandangan Wan Mohd Nor (2005) yang menyatakan bahawa pembangunan yang sebenar merujuk kepada kegiatan terancang yang membawa kepada kebaikan. Namun sekiranya tindakan membawa kepada

kemerosotan seperti runtuhnya nilai moral, akhlak masyarakat, peningkatan jenayah serta sosial maka pembangunan sebenar belum tercapai.

Sebaliknya yang terhasil daripada kegiatan berkenaan, disebut fasad yang dapat merencatkan usaha pembinaan sebuah tamadun. Kes-kes rasuah, penyelewengan, penyalahgunaan kuasa dan lain-lain merupakan bukti bahawa kegiatan fasad telah memberi natijah yang buruk kepada pencapaian matlamat organisasi dan pihak berkepentingan (*stakeholders*). Sebagai contoh, dalam kes Enron iaitu sebuah syarikat utiliti dan gas yang utama di Amerika Syarikat di mana berlakunya penyelewengan dari pihak dalaman organisasi telah menyebabkan kelumpuhan sebuah syarikat korporat yang kukuh. Kejatuhan ini bukan sahaja meruntuhkan prestasi sebuah syarikat namun sebilangan besar pekerja turut menerima kesan domino yang tidak dapat dielakkan apabila berhadapan dengan kehilangan sumber pekerjaan, pendapatan, dana pencen pekerja dan kerugian pelaburan masyarakat (Culpan & Trussel, 2005).

Islam memberi garis panduan dalam menjalani kehidupan yang bersesuaian untuk setiap zaman dan generasi. Garis panduan yang diberikan cukup sempurna untuk manusia seawal bangun tidur sehingga waktu tidur semula. Seperti yang ditegaskan oleh Al-Quran, teladan terbaik yang perlu dicontohi oleh manusia adalah sifat dan akhlak Nabi Muhammad SAW dalam menjalani kehidupan seharian. Keteladanan yang ditunjukkan Nabi Muhammad SAW telah membuktikan bahawa keberkesanan dalam membangunkan masyarakat yang berkualiti tinggi dan amanah dalam menjalankan tanggungjawab yang dipikul tidak akan memberi peluang berlakunya kegiatan yang menyalahi undang-undang dan etika dalam Islam. Pencegahan dari awal adalah langkah yang terbaik dengan cara bermula dengan memupuk nilai dan sifat yang kukuh dan bertepatan dengan norma kehidupan yang harmoni agar individu mempunyai jati diri dalam menjauhi anasir-anasir yang negatif.

METODOLOGI KAJIAN

Metodologi kajian adalah satu pelan tindakan yang memperlihatkan bagaimana sesuatu kajian dijalankan. Metodologi kajian menjadi panduan kepada pengkaji untuk mengumpul dan menganalisis data terhadap penyelidikan yang dijalankan. Dalam kajian ini, metodologi yang digunakan adalah berasaskan pendekatan kualitatif. Kajian ini menggunakan dokumentasi untuk mendapatkan data primer dan sekunder berkaitan objektif kajian.

Kaedah Analisis Data

Penyelidikan akan menjalankan analisis deskriptif kualitatif, yang melibatkan penyediaan penerangan terperinci tentang objek kajian, khususnya berkaitan dengan hipotesis yang dirumuskan. Melalui analisis ini, satu kesimpulan akan dibuat berdasarkan tafsiran (Setyosari, 2013). Penyelidikan akan berasaskan teori dan pada masa yang sama akan menggabungkan data lapangan. Data yang dianalisis akan menggunakan kaedah deduktif untuk mengurus dan menganalisis data, bermula dengan maklumat umum dan kemudian membuat kesimpulan khusus (Hanum, 2013).

Kaedah Dokumentasi

Kaedah dokumentasi melibatkan kajian analisis terhadap bahan-bahan bercetak seperti jurnal, buku, artikel, prosiding, akhbar dan sebagainya. Penyelidik menggunakan kaedah dokumentasi ini untuk mendapatkan gambaran yang lebih jelas dan mendalam terhadap kajian yang ingin dijalankan.

DEFINISI RASUAH

Rasuah merupakan satu konsep yang berakar umbi daripada perkataan Arab *al-risywah* dan dalam Al-Quran, ia secara jelas dikutuk sebagai jenayah yang bertentangan dengan prinsip Islam. Walau bagaimanapun, dalam undang-undang Malaysia, rasuah tidak mempunyai definisi yang tepat. Meskipun terdapat usaha daripada pakar dalam bidang berkenaan yang cuba memberikan pengertiannya. Menurut Kamus Concise Law Dictionary oleh P. G. Osborne, rasuah boleh difahami sebagai satu bentuk ganjaran atau hadiah yang diberikan kepada seseorang dengan niat untuk mempengaruhi tingkah laku mereka. Selain itu, John B. Saunders, dalam Kamus Mozley dan Whiteley Law, mencadangkan makna rasuah sebagai sesuatu yang melibatkan pertukaran wang sama ada untuk memenuhi atau mengabaikan tanggungjawab seseorang.

Rasuah, seperti yang ditakrifkan oleh Kamus Dewan Edisi Keempat (2013), merujuk kepada perbuatan menawarkan rasuah atau terlibat dalam rasuah, yang melibatkan pemberian atau penerimaan wang untuk kepentingan peribadi. Syed Hussein Alatas (2015) menjelaskan lagi bahawa rasuah ialah penyalahgunaan kuasa yang menguntungkan individu secara tidak sah. Menerima rasuah biasanya berpunca dari penglibatan dalam tingkah laku yang tidak beretika seperti menerima hadiah atau wang untuk mempengaruhi keputusan atau melakukan tindakan yang tidak wajar. Selain itu, mereka yang menerima rasuah kebanyakannya memegang

jawatan penting atau mempunyai kuasa untuk memberi kesan kepada proses membuat keputusan. Perlu diingatkan bahawa rasuah tidak terhad kepada sektor awam sahaja akan tetapi juga meliputi sektor swasta. Dalam sektor swasta, rasuah biasanya berlaku melalui pertukaran, sama ada wang atau hadiah dengan pihak yang memegang kuasa untuk mempengaruhi keputusan perniagaan. Selain itu, rasuah kerap berlaku dalam sektor yang berkaitan dengan perolehan kontrak seperti projek pembinaan dan pembangunan infrastruktur. Tambahan pula, rasuah juga boleh berlaku dalam sektor perubatan kesihatan, di mana individu boleh menawarkan rasuah kepada doktor sebagai pertukaran untuk perkhidmatan yang lebih pantas atau lebih baik.

Rasuah menimbulkan bahaya besar kepada kerajaan kerana ia menjejaskan kepercayaan dan jati diri individu. Kesan negatif rasuah dirasai dalam kedua-dua sektor awam dan swasta, yang membawa kepada kemerosotan ekonomi, kualiti kerja yang rendah, dan penyalahgunaan kuasa. Percubaan kerajaan untuk menampung kos yang berkaitan dengan amalan rasuah hanya merosakkan reputasinya dan menjejaskan pelaburan asing. Tambahan pula, rasuah menghakik kepercayaan orang ramai terhadap kerajaan dan ahli politik. Hal ini kerana penjawat awam yang tidak mempunyai amanah dan integriti dalam menjalankan tanggungjawab menyumbang kepada penyelewengan yang terkutuk. Isu ini khususnya melanda Malaysia, telah mencemarkan imej antarabangnya dan menghalang negara asing daripada terlibat dalam perniagaan atau perkongsian kerana kebimbangan terhadap rasuah.

DALIL PENGHARAMAN RASUAH

Pencegahan rasuah menurut agama Islam yang berpandukan kepada ayat-ayat Al-Quran dan Al-Hadith menekankan aspek-aspek keadilan dan mengharamkan penyelewengan dalam pemerintahan. Terdapat beberapa potong ayat yang berada di dalam Al-Quran menyentuh mengenai keadilan dan haram memakan harta yang bukan hak dan secara salah. Antaranya adalah seperti berikut:

i) Surah Al-Nisa' ayat 58

Firman Allah SWT:

﴿إِنَّ اللَّهَ يَأْمُرُكُمْ أَنْ تُؤَدُّوا الْأَمَانَاتِ إِلَىٰ أَهْلِهَا وَإِذَا حَكَمْتُمْ بَيْنَ النَّاسِ أَنْ تَحْكُمُوا بِالْعَدْلِ ۗ إِنَّ اللَّهَ نِعِمَّا يَعِظُكُمْ بِهِ ۗ إِنَّ اللَّهَ كَانَ سَمِيعًا بَصِيرًا﴾

(Al-Quran, 4:58)

Maksudnya:

Sesungguhnya Allah menyuruh kamu supaya menyerahkan segala jenis amanah kepada ahlinya (yang berhak menerimanya), dan apabila kamu menjalankan hukum di antara manusia, (Allah menyuruh) kamu menghukum dengan adil. Sesungguhnya Allah dengan (suruhanNya) itu memberi pengajaran yang sebaik-baiknya kepada kamu. Sesungguhnya Allah sentiasa Mendengar, lagi sentiasa Melihat.

ii) Surah Al-Baqarah ayat 188

Firman Allah SWT:

وَلَا تَأْكُلُوا أَمْوَالَكُمْ بَيْنَكُمْ بِالْبَاطِلِ وَتُدْلُوا بِهَا إِلَى الْحُكَّامِ لِتَأْكُلُوا فَرِيقًا مِّنْ أَمْوَالِ النَّاسِ بِالْإِثْمِ وَأَنْتُمْ تَعْلَمُونَ

(Al-Quran, 2:188)

Maksudnya:

Dan janganlah kamu makan (atau mengambil) harta (orang-orang lain) di antara kamu dengan jalan yang salah, dan jangan pula kamu menghulurkan harta kamu (memberi rasuah) kepada hakim-hakim kerana hendak memakan (atau mengambil) sebahagian dari harta manusia dengan (berbuat) dosa, padahal kamu mengetahui (salahnya).

Ayat-ayat Al-Quran di atas jelas menunjukkan bahawa memakan harta orang lain dengan cara yang salah dan berdosa seperti menerima rasuah adalah satu perbuatan kezaliman dalam menegakkan keadilan (al-Bahi 1980:135).

Selain dalil-dalil pengharaman rasuah dari ayat-ayat Al-Quran, terdapat juga dalil-dalil dari Al-Hadith yang menunjukkan bahawa perbuatan rasuah adalah haram di sisi agama Islam dan undang-undang pencegahan rasuah oleh negara adalah selari dengan saranan Nabi Muhammad SAW. Beberapa dalil hadith yang berkaitan dengan pencegahan gejala rasuah, penggelapan barang dan pemberian hadiah yang memberi maksud kepada rasuah. Dalil-dalil tersebut seperti:

i) Hadith mengenai perasuah dan penerima rasuah

عن عبدالله عمرو قال: لعن رسول الله صلى الله عليه وسلم الراشئ و المرتشئ

(Al-Manziri t.th. Mukhtasar Sunan Abi Daud. Kitab Al-Aqdiah. (Juz 5). Bab Fi Karahah Al-Risywah:326)

Maksudnya:

Diriwayatkan daripada Abd Allah b. Amru “Rasulullah SAW melaknat perasuah dan penerima rasuah.”

ii) Hadith mengenai penggelapan barang termasuk rasuah

عن عدى بن عميرة الكندي قال: سمعت رسول الله صلى الله عليه وسلم يقول: مَنْ اسْتَعْمَلَنَا مِنْكُمْ عَلَى عَمَلٍ، فَكَتَمْنَا مَخِيطًا فَمَا فَوْقَهُ؛ كَانَ غُلُوبًا يَأْتِي بِهِ يَوْمَ الْقِيَامَةِ، قَالَ: فَقَامَ إِلَيْهِ رَجُلٌ أَسْوَدٌ مِنَ الْأَنْصَارِ -كَأَنِّي أَنْظُرُ إِلَيْهِ- فَقَالَ: يَا رَسُولَ اللَّهِ، أَقْبَلَ عَنِّي عَمَلِكَ، قَالَ: وَمَا لَكَ؟ قَالَ: سَمِعْتُكَ تَقُولُ: كَذَا وَكَذَا، قَالَ: وَأَنَا أَقُولُهُ الْآنَ، مَنْ اسْتَعْمَلَنَا مِنْكُمْ عَلَى عَمَلٍ، فَلْيَجِئْ بِقَلِيلِهِ وَكَثِيرِهِ، فَمَا أُوتِيَ مِنْهُ أَخَذَ، وَمَا نُهِيَ عَنْهُ أَنْتَهَى

(Imam Muslim. 1998. Sahih Al-Muslim (Juz 3). Kitab Al-Imarah. Bab Ma Kuntum Al-Amra Fahuwa Ghalul: 324).

Maksudnya:

Diriwayatkan daripada Ady b. Umairah al-Kindi: Aku mendengar Rasulullah (s.a.w) bersabda: “Barang siapa di antara kamu kami angkat menjadi pegawai pejabat, lalu dia menyembunyikan sebatang jarum atau lebih kecil lagi daripada itu kepada kami, maka perbuatan itu tergolong perbuatan merosakkan dan pada hari kiamat nanti dia akan membawa barang itu.” Lalu ada seorang lelaki berkulit hitam daripada golongan Ansar berdiri menghampiri beliau, aku pun memperhatikannya. Orang itu berkata: “Wahai Rasulullah, terimalah amalmu dari saya” Tanya beliau, “Ada apakah dengan kamu?” Kata orang itu, “Saya mendengar engkau bersabda begitu dan begini” Beliau bersabda, “Sekarang ku katakan barangsiapa di antara kamu kami angkat menjadi seorang pengurus suatu pekerjaan, hendaklah melaksanakannya sedikit atau banyak, yang disuruh kerjakanlah dan yang dicegah tinggalkanlah.”

iii) Hadith mengenai pemberian hadiah untuk petugas pemerintah

عن أبي حميد الساعدي رضي الله عنه قال: (استعمل رسول الله صلى الله عليه وسلم رجلا على صدقات بني سليم يدعى ابن اللثبية، فلما جاء حاسبه، قال: هذا مالكم، وهذا هدية، فقال رسول الله صلى الله عليه وسلم: فهلاً جلست في بيت أبيك وأمك حتى تأتيك هديتك إن كنت صادقاً؟! ثم خطبنا فحمد الله وأثنى عليه ثم قال: أما بعد فإني أستعمل

الرجل منكم على العمل مما ولاني الله, فيأتي فيقول: هذا مالكم, وهذا هدية أهديت لي! أفلا جلس في بيت أبيه وأمه حتى تأتيه هديته؟! والله لا يأخذ أحد منكم شيئاً بغير حقه إلا لقي الله يحمله يوم القيامة, فلأعرفنَّ أحداً منكم لقي الله يحمل بغيراً له رُغاء (صوت), أو بقره لها حُوار, أو شاة تيعر (تصيح), ثم رفع يديه حتى رأى بياض إبطيه يقول: اللهم هل بلغت) رواه البخاري . وفي رواية مسلم قال عروة: (فقلتُ لأبي حُميد الساعدي: أسمعته من رسول الله صلى الله عليه وسلم؟ فقال: من فيه إلى أذني).

(Imam Muslim. 1998. Sahih Al-Muslim. (Juz 3). Kitab Al-Imarah. Bab Tahrim Hadaya Al-Amal: 322).

Maksudnya:

Diriwayatkan daripada Abu Humayd Al-Sadi ra: Rasulullah SAW pernah menugaskan seorang lelaki daripada kabilah Asad bernama Ibd Lutbiyyah untuk mengurus harta sedekah (zakat) dari Bani Sulaym. Setelah datang kembali dari tugasnya, harta-harta tersebut dihitung olehnya, dia berkata, "Mengapa kamu tidak duduk di rumah ayah dan ibumu saja sampai hadiah itu datang sendiri kepadamu, kalau perbuatanmu memang benar?" Kemudian beliau berpidato memuji dan menyanjung Allah, lalu bersabda, "Amma Ba'du. Sesungguhnya aku menugaskan seorang di antara kamu untuk mengurus sesuatu pekerjaan yang telah dikuasakan kepadaku oleh Allah, lalu orang itu datang kepadaku seraya berkata, "Ini hartamu dan ini adalah hadiah yang telah diberikan kepadaku," Mengapa dia tidak duduk di rumah ayah dan ibunya saja sampai hadiahnya itu datang sendiri kepadanya, kalau perbuatannya itu benar? Demi Allah, seseorang daripada kamu merungut sesuatu yang bukan haknya pasti menemui Allah pada hari kiamat nanti dengan membawa harta yang telah diambil tersebut. Maka, aku benar benar mengetahui seseorang di antara kamu yang menemui Allah seraya memikul unta yang sedang melenguh lenguh atau sapi yang sedang menguak nguak atau kambing yang sedang mengembik-embik." Kemudian beliau mengangkat tangannya sehingga kelihatan putih kedua ketiaknya seraya bersabda, "wahai Allah telah aku sampaikan." Matakun melihat sendiri dan telingaku mendengar sendiri peristiwa ini.

Dalil-dalil di atas menunjukkan perbuatan amalan rasuah adalah perbuatan yang melanggar hukum syarak dan haram dilakukan oleh sesiapa pun. Mengkhianati amanah dan mengambil harta orang lain melalui cara rasuah memberi

impak yang negatif dalam pembinaan suatu tamadun bangsa malah gejala sebegini akan merugikan bangsa dan mencemarkan kesucian agama itu sendiri.

Islam telah menetapkan bahawa sesiapa yang terlibat dengan perbuatan rasuah perlu dihukum mengikut hukuman ta'zir. Hukuman ta'zir adalah suatu bentuk hukuman bagi menjaga dan memelihara hubungan manusia dengan Allah S.W.T serta hubungan sesama manusia. Justeru, hukumannya mesti ditentukan oleh pihak pemerintah mengikut kesesuaian realiti semasa demi menjaga kemaslahatan masyarakat (Al-Humam, 1970).

PENCEGAHAN RASUAH MELALUI AMALAN SIFAT DAN AKHLAK RASULULLAH

Setiap Rasul yang diturunkan Allah SWT untuk menyebarkan agama Islam di muka bumi ini dikurniakan keistimewaan yang berupa kitab, mukjizat dan sifat-sifat kemuliaan. Hal ini menunjukkan kekuasaan Allah SWT tiada batas dalam mengkehendaki sesuatu perkara itu berlaku. Sifat-sifat kemuliaan yang diberikan kepada Nabi Muhammad SAW ialah *siddiq* (jujur), *amanah* (terpercaya), *tabligh* (menyampaikan) dan *fathanah* (bijaksana). Justeru itu, sifat Rasulullah ini boleh diteladani oleh pemimpin dan masyarakat dalam menangani isu yang berleluasa seperti rasuah dan penyelewengan yang salah serta sifat-sifat mazmumah yang lain untuk kesejahteraan hidup sejagat.

i) Siddiq (Jujur)

Kehidupan manusia tidak dapat lari dari melakukan kegiatan secara bermasyarakat. Siddiq merupakan sifat yang jujur dari segi perbuatan mahupun percakapan. Sifat kejujuran itu amat dititikberatkan untuk menjalani kehidupan yang harmoni. Justeru itu, jujur merupakan karakter atau keperibadian diri adalah satu sifat yang dikehendaki oleh setiap manusia. Jujur merupakan fitrah penciptaan manusia yang dicipta oleh Allah SWT sebagai makhluk yang memiliki martabat yang tertinggi di antara makhluk-makhluk yang lain. Selain itu, jujur adalah akhlak yang utama diajarkan oleh agama Islam, bahkan merupakan salah satu akhlak keperibadian Rasulullah. Islam mendidik manusia untuk bersifat jujur kerana jalan seorang mukmin untuk menuju ke syurga ialah kejujuran. Oleh itu, sifat bohong yang merupakan sifat yang bertentangan dengan kejujuran akan membuatkan manusia itu melampaui batas dan ketetapan Allah SWT.

Berdasarkan firman Allah SWT:

يَا أَيُّهَا الَّذِينَ ءَامَنُوا اتَّقُوا اللَّهَ وَكُونُوا مَعَ الصَّادِقِينَ

“Hai orang-orang yang beriman bertaqwalah kepada Allah dan hendaklah kamu bersama orang-orang yang benar (jujur).”

(Surah At-Taubah: 119)

Pemahaman terhadap sifat jujur dan akhlak yang baik ini mampu menghindarkan manusia untuk melakukan perbuatan yang keji dan dilarang Allah SWT. Antara perbuatan yang melanggar perintah Allah termasuklah jenayah rasuah. Rasuah akan mengurangkan kepercayaan dan keyakinan masyarakat kepada pemimpin dan negara. Secara ringkasnya, kegiatan rasuah mampu memberi impak dan implikasi yang besar pada pelbagai aspek terutama kepada negara.

ii) Amanah (Terpercaya)

Islam mengajar manusia agar melakukan amar ma’ruf dan nahi mungkar iaitu menyeru kepada perbuatan baik dan mencegah perbuatan keji. Peranan agama terhadap manusia adalah untuk memberi petunjuk dan cara menjalani kehidupan dengan baik. Allah SWT menyuruh hamba- hamba- Nya untuk memiliki akhlak yang mulia dan baik dan antaranya adalah amanah (Ghifari et al., 2020). Hal ini kerana sifat tersebut merupakan sifat yang sangat penting dan tinggi di sisi Tuhan serta disebut dalam firman Allah:

وَالَّذِينَ هُمْ لِأَمْتِنَتِهِمْ وَعَهْدِهِمْ رُءُونَ

Maksudnya:

“Dan (sungguh beruntung) orang yang memelihara amanah-amanah dan janjinya”

(QS Al-Mu’minun :8).

Kepentingan menjaga amanah ini perlu ditekankan secara khusus untuk menjadi hamba yang taat akan perintah Allah SWT. Amanah merupakan satu tanggungjawab yang berat dan tidak semua manusia mampu untuk menjalankan amanah dengan baik. Selain itu, ramai masyarakat pada hari ini berfikiran sempit dalam meletakkan erti amanah itu hanya kepada menjalankan tanggungjawab kerja, simpanan, pinjaman barang atau sebagainya. Namun jika

direnung kembali makna amanah yang disebut dalam Al-Quran, skopnya adalah lebih meluas seperti yang dinyatakan dalam firman Allah SWT:

إِنَّا عَرَضْنَا الْأَمَانَةَ عَلَى السَّمَوَاتِ وَالْأَرْضِ وَالْجِبَالِ فَأَبَيْنَ أَنْ يَحْمِلْنَهَا وَأَشْفَقْنَ مِنْهَا وَحَمَلَهَا
الْإِنْسَانُ إِنَّهُ كَانَ ظَلُومًا جَهُولًا

Maksudnya:

Sesungguhnya Kami telah kemukakan tanggungjawab amanah (Kami) kepada langit dan bumi serta gunung-ganang (untuk memikulnya), maka mereka enggan memikulnya dan bimbang tidak dapat menyempurnakannya (kerana tidak ada pada mereka persediaan untuk memikulnya); dan (pada ketika itu) manusia (dengan persediaan yang ada padanya) sanggup memikulnya. (Ingatlah) sesungguhnya tabiat kebanyakan manusia adalah suka melakukan kezaliman dan suka pula membuat perkara-perkara yang tidak patut dikerjakan.

(Surah Al-Ahzab: 72)

Ayat di atas menunjukkan bahawa sifat amanah adalah sangat penting untuk kehidupan manusia. Amanah dalam memikul tanggungjawab yang diberi hendaklah dilaksanakan dengan penuh jujur. Ia seringkali dikaitkan dengan jenayah rasuah. Amalan rasuah ini berlaku kerana pengabaian sifat amanah dan lebih mementingkan kepuasan diri tanpa memikir kesan buruk yang akan dihadapi. Pengabaian sifat amanah ini mampu merosakkan kemaslahatan manusia sejagat dan masyarakat kini banyak mengabaikan dan tidak memupuk sifat amanah dalam diri mereka. Hal inilah yang membuatkan isu-isu jenayah sukar dibendung kerana tiada kesedaran untuk menjalankan amanah yang diberikan (Ghifari et al., 2020).

iii) Tabligh (Menyampaikan)

Tabligh ialah menyampaikan hal-hal yang datang dari Allah. Perbuatan ini juga boleh dicontohi untuk menyampaikan sesuatu perkara yang baik atau buruk dengan niat untuk mencegah. Sebagai contoh perbuatan rasuah yang berlaku perlulah dilaporkan kepada pihak yang berkuasa untuk diambil tindakan undang-undang keatas perlaku. Namun tabligh ini juga boleh difahami dengan menyampaikan dakwah. Penyampaian dakwah secara meluas boleh menyebarkan ilmu pengetahuan tanpa had. Seperti ayat yang dipetik dari Al-Quran surah Al-Maidah ayat 67 yang berfirman:

﴿يَا أَيُّهَا الرَّسُولُ بَلِّغْ مَا أُنزِلَ إِلَيْكَ مِنْ رَبِّكَ ۗ وَإِنْ لَمْ تَفْعَلْ فَمَا بَلَّغْتَ
رِسَالَاتِهِ ۗ وَاللَّهُ يَعْصِمُكَ مِنَ النَّاسِ ۗ إِنَّ اللَّهَ لَا يَهْدِي الْقَوْمَ الْكَافِرِينَ﴾

Maksudnya:

Wahai Rasul Allah! Sampaikanlah apa yang telah diturunkan kepadamu dari Tuhanmu; dan jika engkau tidak melakukannya (dengan menyampaikan semuanya), maka bermakna tiadalah engkau menyampaikan perutusanNya; dan Allah jualah akan memeliharaku dari (kejahatan) manusia. Sesungguhnya Allah tidak memberi hidayah petunjuk kepada kaum yang kafir.

Ayat di atas menjelaskan bahawa sifat Nabi Muhammad SAW dalam menyampaikan wahyu yang diturunkan oleh Allah SWT kepada umat manusia disampaikan dengan baik dan tiada tertinggal walau sepotong ayat. Hal ini boleh dicontohi dengan mengikut keperibadian akhlak Rasulullah dalam menyampaikan perutusan yang diberi kepada beliau. Keperibadian Nabi Muhammad SAW ini dapat memberi kekuatan kepada pembentukan akhlak yang sempurna dalam menetapkan jati diri manusia untuk lebih bersikap amanah terhadap tanggungjawab yang dipikul.

iv) Fathanah (Bijaksana)

Fathanah bermaksud cerdas, pandai atau bijaksana. Setiap utusan Allah SWT yang menyampaikan dakwah Islamiyah di dunia ini dipastikan memiliki kebijaksanaan dan kecerdasan serta memiliki daya intelektual yang tinggi dan daya saing yang sempurna. Hal ini kerana, kebijaksanaan dan kecergasan seseorang itu mampu memberi pandangan yang tinggi dan kepercayaan terhadapnya dalam penyampaian dan penyebaran dakwah Islam kepada manusia. Seseorang individu mempunyai daya tarikan apabila memiliki akal yang cergas dan minda yang cerdas. Dalam Al-Quran Allah SWT berfirman dengan menegaskan:

﴿وَلَقَدْ ءَاتَيْنَا إِبْرٰهٖمَ رُشْدَهُ مِن قَبْلُ وَكُنَّا بِهٖ عٰلِمِينَ﴾

(Al-Quran, 21:51)

Maksudnya:

Dan sesungguhnya telah Kami anugerahkan kepada Ibrahim hidayah kebenaran sebelum (Musa dan Harun), dan adalah Kami mengetahui (keadaannya).

Kebijaksanaan ini boleh dipraktikkan dalam melaksanakan hukuman undang-undang ke atas persalah yang melakukan jenayah rasuah agar ia keadilan dan ketepatan hukuman yang diberikan tidak dipersoal. Kebijaksanaan ini juga boleh dilihat pada diri seorang pemimpin melalui pengendaliannya terhadap sesuatu masalah yang dihadapi, sebagai contoh krisis yang dihadapi negara Malaysia disebabkan gejala rasuah yang meningkat. Misalnya, kebijaksanaan dalam mengawal masalah jenayah rasuah dengan melakukan inisiatif-inisiatif yang dapat menyekat aktiviti rasuah daripada terus bergejala. Strategi ini perlu disusun rapi kerana penyelewengan yang berlaku tidak dilakukan secara terbuka melainkan secara halus dan sukar untuk dikenalpasti.

Kesimpulannya, keempat-empat sifat yang ditunjukkan melalui akhlak Nabi Muhammad SAW amatlah memberi kesan dalam pembentukan akhlak yang luhur dan murni dalam mencegah manusia dari melakukan amalan-amalan yang bertentangan dengan agama Islam seperti rasuah, penyelewengan dan penganiayaan dari pelbagai sudut. Pembentukan ini mampu memberi impak yang besar kepada sesebuah negara. Hal ini kerana, sifat yang diterapkan kepada individu ini mampu memberi kemajuan dari segi integriti dan jati diri yang sukar goyah terhadap anasir-anasir buruk seterusnya dapat menjalankan amanah secara telus dan jujur.

CADANGAN DALAM MEMPERKASAKAN SIFAT DAN AKHLAK RASULULLAH DALAM KEHIDUPAN SEMASA

Cadangan dalam memperkasakan sifat dan akhlak Nabi Muhammad SAW dalam kehidupan semasa ini adalah dengan melakukan gerakan dakwah. Pada masa kini, dunia semakin moden dan tiada had batasan. Justeru itu, gerakan dakwah boleh memanfaatkan kelebihan yang ada untuk menyampaikan mesej tanpa halangan dan batasan dengan tujuan menyebarkan dan mengajak manusia untuk terus melakukan kebaikan dan meninggalkan larangan Allah SWT.

Gerakan dakwah

Dakwah iaitu menyeru manusia mengamalkan ajaran dan nilai Islam dengan menyuruh melakukan kebaikan dan melarang melakukan perbuatan mungkar. Tugas berdakwah juga merupakan kewajipan terhadap setiap orang Islam. Tugas ini adalah amanah yang mesti dipikul oleh semua orang Islam terutamanya bagi pihak

yang mempunyai kekuasaan seperti penguasa daulah (Zulkiflie Abd Ghani & Mohd Syukri Yeoh Abdullah, 2005).

Berdasarkan firman Allah SWT di dalam Al-Quran Surah Al-Nahl ayat 125 yang berbunyi:

أَدْعُ إِلَى سَبِيلِ رَبِّكَ بِالْحُكْمَةِ وَالْمَوْعِظَةِ الْحَسَنَةِ ۚ وَجَادِلْهُمْ بِالَّتِي هِيَ
أَحْسَنُ ۚ إِنَّ رَبَّكَ هُوَ أَعْلَمُ بِمَنْ ضَلَّ عَنْ سَبِيلِهِ ۚ وَهُوَ أَعْلَمُ بِالْمُهْتَدِينَ

(Al-Quran, 16:125)

Maksudnya:

Serulah ke jalan Tuhanmu (wahai Muhammad) dengan hikmat kebijaksanaan dan nasihat pengajaran yang baik, dan berbahaslah dengan mereka (yang engkau serukan itu) dengan cara yang lebih baik; sesungguhnya Tuhanmu Dia lah jua yang lebih mengetahui akan orang yang sesat dari jalanNya, dan Dia lah jua yang lebih mengetahui akan orang-orang yang mendapat hidayah petunjuk.

Sebagaimana saranan Allah SWT dalam ayat Al-Quran tersebut, dapat diambil iktibar bahawa kaedah dakwah secara hikmah dan memberi nasihat serta berdebat dengan baik adalah penyelesaian yang mapan dalam pencegahan rasuah. Kaedah dakwah yang digunakan bagi memperkasakan sifat dan akhlak Nabi Muhammad SAW ialah dakwah melalui *Dakwah bi al hal* dan *Dakwah bi al-hikmah*.

i) **Dakwah bi al-hal**

Dakwah bi al-hal adalah dakwah yang dimulakan dari diri sendiri. Ini bermakna seseorang pendakwah meletakkan dirinya sebagai model utama dalam mencapai misi dakwahnya berdasarkan akhlak yang mulia berpandukan Al-Quran dan Al-Sunnah sama ada berkaitan kata-kata, perbuatan dan harta (Ghalwash t.th). *Dakwah bi al-hal* juga disebut sebagai *al-Tabligh bi al-sirah al-hasanah* oleh Abd al-Karim Zaydan (1987:485). Menurut Abd al-Karim Zaydan penyampaian dakwah melalui model akhlak yang baik dan terpuji daripada seorang pendakwah akan memberi kesan yang lebih mendalam berbanding dakwah secara lisan sahaja.

Menurutnya lagi, dakwah Islam sebenarnya tersebar di kebanyakan negara di dunia ini melalui *dakwah bi al-hal* yang ditonjolkan melalui akhlak yang baik para pendakwah sehingga mampu menarik perhatian masyarakat bukan Islam terhadap agama Islam. Hamka (1987) turut bersependapat bahawa akhlak merupakan alat dakwah yang sangat utama kerana budi yang nyata dapat dilihat orang, bukan pada pidato, bukan pada tulisan melainkan budi pekerti yang luhur. Manakala Ulwan dalam bukunya "Akhlaiyyah al-da'iyah (1991) telah

menyatakan bahawa seorang pendakwah yang telah menghiasi dirinya dengan kemuliaan akhlak dan menjauhkan diri daripada akhlak yang buruk dan tercela maka kesannya pada membawa perubahan yang sangat besar dan kedinamikannya pada mata masyarakat adalah sangat luar biasa.

Dakwah bi al-hal merupakan satu kaedah yang cukup penting dalam menjayakan pencegahan rasuah pada masa kini. Segala usaha dalam menjauhkan diri dan keluarga daripada kemewahan dunia merupakan cara yang terbaik kerana keghairahan mengejar kemewahan boleh mengakibatkan berlakunya gejala rasuah sama ada di peringkat bawahan ataupun atasan.

ii) **Dakwah bi al-hikmah**

Selain meletakkan *dakwah bi al-hal* sebagai kaedah pencegahan rasuah pada masa kini, penggunaan *dakwah bi al-hikmah* juga dikemukakan sebagai satu alternatif untuk mengatasi masalah rasuah. *Dakwah bi al-hikmah* merupakan dakwah yang dilakukan dengan penuh diplomasi dan lemah lembut mengikut suasana dan keadaan serta mempunyai ilmu yang mendalam untuk memberi nasihat dan petunjuk kepada orang lain (Ghalwash t.th).

Hikmah adalah mengajak orang lain melakukan perbuatan baik dengan nasihat yang benar (Makanisi, 2001). Manakala menurut Muhammad Hussain Fadhullah (1997) hikmah merupakan kaedah yang perlu diaplikasikan oleh para pendakwah kerana para pendakwah harus bijak menggunakan berbagai cara mengikut kesesuaian realiti masyarakat dan peredaran zaman.

Dakwah bi al-hikmah ini memainkan peranan penting dalam membentuk keperibadian yang baik dan luhur. Perkara yang sering ditekankan dalam menyampaikan dakwah adalah kepentingan solat. Para pemimpin dan organisasi kerajaan mahupun swasta perlulah menjaga solat dengan bersungguh-sungguh. Hal ini kerana solat merupakan pembentuk peribadi manusia yang dapat menghindarkan dari melakukan sebarang kemungkaran dan kejahatan. Sejajar dengan itu, kewajipan solat tepat di awal waktu mampu menghalang manusia dari terjerumus ke arah keburukan. Selain daripada menjaga solat, hendaklah melakukan sesuatu tugas seiring dengan kata-kata yang diucapkan kerana perbuatan dan kata-kata yang tidak seiring akan menunjukkan berlakunya pendustaan.

Di samping itu, *dakwah bi al-hikmah* turut menekankan aspek amanah dan saling nasihat menasihati dalam melaksanakan tugas (al-Tabari, 2001). Teladan melalui pemimpin yang mempunyai kerendahan hati dan baik budi pekerti juga

merupakan dakwah yang penuh hikmah. Keperibadian yang mulia melalui pelaksanaan amalan fardhu dan sunat mampu memberi impak yang besar untuk dicontohi oleh masyarakat. Terutamanya apabila soal kebenaran dan keadilan tidak disorokkan malah bersifat terbuka dengan meminta rakyat menegur dan menasihati kerajaan sekiranya berlaku sebarang penyelewengan dan kezaliman.

Oleh itu, gejala rasuah, penyelewengan dan kezaliman dalam masyarakat juga dilihat dapat dikawal melalui gerakan dakwah secara konsisten. Kaedah *dakwah bi al-hal* dan *dakwah bi al-hikmah* ini merupakan satu alternatif untuk memperkasakan sifat dan akhlak Nabi Muhammad SAW dalam diri anggota masyarakat ke arah pembentukan akhlak yang sempurna. Secara tidak langsung, kaedah dakwah ini mampu memberi kesan dalam pembangunan keperibadian modal insan sekaligus mengelakkan diri daripada terjerumus ke arah jalan yang bertentangan dengan agama Islam dan undang-undang.

KESIMPULAN

Kesimpulannya, keperibadian dan akhlak Nabi Muhammad SAW boleh diteladani dan sesuai mengikut peredaran masa. Amalan sifat-sifat mulia yang ditunjukkan oleh para Rasul dan Nabi boleh membantu dalam mengawal isu yang melanda masyarakat kini iaitu gejala rasuah. Asas akhlak yang baik dan jati diri yang sempurna mampu menghasilkan generasi yang berwawasan tinggi serta berdaya saing yang sihat. Pembentukan generasi berakhlak baik ini mampu mengurangkan kadar jenayah rasuah kerana memiliki rasa tanggungjawab yang tinggi terhadap amanah yang dipikul dan sukar untuk digoyahkan dengan kemewahan dan jawatan yang ditawarkan hanya untuk kepuasan diri. Kekuatan ini sekaligus melahirkan masyarakat yang berintegriti dan mempunyai semangat dalam membangunkan negara yang maju tanpa terjebak dalam penyelewengan yang salah serta dapat memelihara hak-hak asasi manusia tanpa melakukan kezaliman dan ketidakadilan. Pemantapan dari segi rohani dan sikap individu ini mempunyai potensi yang besar dalam rangka pencegahan amalan rasuah untuk sesebuah negara dan mampu memberi kepercayaan kepada pelaburan untuk melabur agar dapat memantapkan ekosistem negara pada masa kini.

PENGHARGAAN

Kami ingin mengucapkan jutaan terima kasih kepada pihak Kementerian Pengajian Tinggi Malaysia (KPTM) kerana membiaya sepenuhnya kajian ini di bawah Projek Penyelidikan *Fundamental Research Grant Scheme* (FRGS) USIM, dengan tajuk

Pendekatan Bersepadu Pencegahan Rasuah Berdasarkan Kerangka Syariah Dan Perundangan Di Malaysia Ke Arah Wawasan Kemakmuran Bersama 2030, Kod Penyelidikan USIM/FRGS/FSU/KPT/50922. Ketua penyelidik juga ingin merakamkan penghargaan kepada ahli kumpulan penyelidik kajian ini atas kerjasama yang diberikan.

RUJUKAN

- Ab Rahman, A., Aziz, M. Y. A., Salleh, A. Z., & Kamarulzaman, A. N. (2023). Gejala Rasuah Dan Implikasi Terhadap Masyarakat Malaysia Menurut Perspektif Syarak: The Symptoms of Corruption and Implications For The Malaysian Community According To The Shariah Perspective. *Journal of Fatwa Management and Research*, 28(2), 87-103.
- Adha, M. K., & Darmiyanti, A. (2022). Implementasi pendidikan karakter Islam dalam pembelajaran pendidikan agama Islam masa pandemi Covid-19 di Sekolah Dasar. *Edukatif: Jurnal Ilmu Pendidikan*, 4(1), 917-924.
- Al- Quran
- Alamsyah, Y. A. (2017). Membumikan Sifat Rasul dalam Kepemimpinan Pendidikan. *Al-Idarah: Jurnal Kependidikan Islam*, 7(2), 120-141.
- Al-Bahi, Muhammad. 1980M/1401H. *Al-Din wa al dawlah min taujih al-Quran al-karim*. al-Qahirah: Maktabah al-Wahbah.
- Al-Humam, Kamal al-Din Muhammad. 1970M/1391H. *Fath al-qadir al-Qahirah: al-babi*.
- Al-Tabari, Abi Jaafar Muhammad b. Jarir. 2001M/1422H. *Tarikh al-Tabari tarikh al-Umam wa al-mulk Juz 3&4*. Suntingan Muhammad Ali Baithun. Beirut: Dar al-Kitab al-Ilmiyyah.7890
- Culpan, R. & Trussel, J. 2005. Applying the agency and stakeholder theories to the Enron debacle: an ethical perspective. *Business and Society Review* 110(1): 59-76.
- Ghalwash, Ahmad t.th. *Al-Da'wah al -Islamiyyah usuliha wa wasa'luha*. al-Qahirah: Dar al-Kitab al-Masdariy.

- Ghifari, M. I., Saputra, A., & Taufik, C. H. 2020. Perspektif Amanah Dalam Al-Qur'an. *ZAD Al-Mufassirin*, 2(2), 143-160.
- Hamka. 1987. *Sejarah Umat Islam*. Singapura: Pustaka Nasional.
- Hanum, N. S. (2013). Keefetifan e-learning sebagai media pembelajaran (studi evaluasi model pembelajaran e-learning SMK Telkom Sandhy Putra Purwokerto). *Jurnal Pendidikan Vokasi*, 3(1), 90–102. <https://doi.org/10.21831/jpv.v3i1.1584>
- Ishak, S. (2011). Model kepemimpinan etika berlandas sirah Nabi Muhammad SAW. *Jurnal Hadhari*, 3(2), 23-44.
- Kamus Dewan Edisi Keempat. (2013). Kuala Lumpur: Dewan Bahasa dan Pustaka.
- Makanisi, Uthman Qadriy. 2001M/1422H. *Min isalib al- tarbiyah fi al-Quran al- karim*. Beirut: Dar Ibn al-Jawzy.
- Muhammad Hussain Fadhullah. 1997. *Metodologi Dakwah Dalam Al-Quran Penggunaan Bagi Aktiwis*. Terj. Musa Kazhim & Tarmana Ahmad Qasim Jakarta: Lantera.
- Musyrifin, Z. (2020). Implementasi sifat-sifat Rasulullah dalam konseling behavioral. *Al Irsyad: Jurnal Bimbingan Konseling Islam*, 11(2), 151-160.
- Setyosari, P. (2013). *Metode Penelitian Pendidikan dan Pengembangan*. Kencana.
- Syed Hussein Alatas. (2015). *The problem of corruption. (Revised edition.)*. Kuala Lumpur: The Other Press Sdn. Bhd.
- Wan Mohd Nor Wan Daud. 2005. *Pembangunan di Malaysia*. Kuala Lumpur: Jabatan Akidah dan Pemikiran Islam, Akademi Pengajian Islam, Universiti Malaya.
- Yasin, R., Ghani, S. A., & bin Jalal, B. (2014). Aplikasi kualiti kepimpinan Rasulullah SAW dalam pembentukan jati diri pendakwah masa kini QURANICA. *International Journal of Quranic. Research*, 6(2), 69-82.
- Zaydan, Abd al-Karim. 1987M/1408M. *Usul al-da'wah*. Beirut: Mu'assasat al-Risalah.
- Zulkiflie Abd Ghani, Z. & Abdullah, M.S.Y. 2005. *Dakwah dan Etika Politik di Malaysia*. Kuala Lumpur: Utusan Publication & Distributors Sdn Bhd.